



Siverth K. Heilmann
Atassut

UPA 2022/173
2. juni 2022

Qanoq iliornikkut eqqumiitsuliornermut isiginnittariaaserput kulturiinnarmut sunngiffimmilu suliaasaannartut attuumassuteqarunnaartillugu, annerusumik inuussutissarsiutitut akuerisaanerulersissinnaanera pillugu apeqquteqaat aallaavigalugu oqallissiaq.

(Inatsisartunut ilaasortaq Aqqalu C. Jerimiassen, Atassut)

Atassummiit siunertaarput eqqumiitsuliorneq annerusumik inuussutissarsiutitut periarfissaalersikkumallugu. Aamma qineqqusaarutigaarput.

Ullutsinnimi suli sunngiffimmiinnaq suliaasaasutut isiginiarneqartarput, aamma inatsisitigut, assersuutigalugu akileraartarnikkut. Ullorlu manna tikillugu eqqumiitsuliorneq eqqartorneqalersillugu suli kulturi, anersaaq, kinaassuserlu annerusumik tunngavilersuutaasarput.

Tamakku ajunngillat, aamma taperserpagut. Taamaattorli eqqumiitsuliornikkut ukiorparujussuarni siuarsaaniarnermi taakkorpiaat tunngavilersuutaasarsimapput. Annerusumillu inuussutissarsiutitut suli isiginiarneqarnerat nikingaarsimanatik. Nuannaarutigaa pulli isiginnaartitsisartorpaaluit, filmiliornikkullu ingerlataqartut, scenelerisut nipilersortartullu illuttut inussanik kisinneqarsinnaasut ullumikkut eqqumiitsuliornikkut inuussutissarsiuteqarsinnaammata.

Nunatsinnilu eqqumiitsuliornikkut piginnaasallit amerlasoorujussuupput, taakkuuppullu eqqumiitsuliornikkut inuussutissarsiuteqalernissaminnut ikaarsaariaannaat, isiginnittariaaserput, inatsisitigullu tulluarsaanikkut periarfississinnaasagut.

Uani oqariartuutigineqarpoq eqqumiitsuliorneq kulturimuunerusoq tunngatinniarneqarnera ajoraluartumik naammassimangitsoq, taassumalu malitsigisarsimagaa politikikkut, aningaasaliinikkut, inatsisiliornikkullu tullerriaarinikkut salliunneqartarsimanginneri.

Oqaasermi kulturi imatut siammasitsigaaq, allaat inuup iliuusai pilersitaalu suulluunniit kulturitut taaneqarsinnaallutik. Tunngavilersuutiginiaraannilu tigussaasunik anguniagaqarnermi tigussaanngippallaarsimasinnaalluni.

Taamaattumik Atassummiit oqallissaarut paasilluarlugu eqqumiitsuliornerup inuussutissarsiutitut annerusumik isigineqalernissaa taperserparput. Akileraartarnikkullu allatuulli inuussutissarsiuteqartutut, namminersortutullu akiligassanik nassiussisinnaalernissaat ilaatigut suliaasaasut annukkumavagut. Minnerunngitsumillu tamatta ilisimalertariaqarparput eqqumiitsuliorneq inuussutissarsiutaasoq periarfissanik ulikkaartoq.